

甯河縣志卷之九

卓行

劉震霄字冲元素性剛直鄉黨莫不敬憚之萬歷間流寇猖獗往來剽掠乃出家財備守具與所千戶協力捍禦後以守城功由貢生授光祿寺掌醢署署丞在任數年乞休歸里

鄭 莊字南華幼有大志以豪俠自喜嘗讀班超傳歎曰大丈夫當如此遂棄制藝習韜畧起家至叅將值鼎革隱居北塘北塘者海濱也每見風雲接地波

甯河縣志

卷之九

卓行

一

浪兼天則悽然感泣有子曰之僑爲擇師罕當意者一日晤王師旦喜曰此其人矣因具厚幣延之至日與師且談古今治亂興亡之故奮袖掀髯不自知其老也居久之卒

張朝相明萬歷間人舉人張濟川曾孫也居寶邑城內當前明流寇入境城陷朝相被執賊愛其櫬梧逼入黨不從三縛而三釋之尋避難山東迨

國朝定鼎歸里於梁城卜居焉以耕讀爲業年九十四而卒

劉健字行四明萬厯間庠生當癸未荒亂所中被兵者數萬人久守乏食健以家穀千餘石給之一時全活者甚衆與本所千戶鄭協力捍禦城賴以安鄭上其功奉文徵入京師議敘以親老力辭未就至今子姓繁衍爲望族皆健植德所致也

于天錫字篤培以貢生考授知縣素性正直言行不苟屢試不遇至老猶勤學不倦嘗雪夜讀書對景言志以玉堂人自期風致洵不凡也其治家尤有道務使各殫其職曾傳一聯云教子有良圖夜雨案前燈

火傳家無別業春風隴上犁鋤迄今子孫猶敬佩之崔國祚字延齡貢生父早逝奉養後母極盡其誠家頗饒多侍使然潔滄澹奉盤匱不欲令他人代也母病移傍母榻旁跬步不離中夜聞呻吟立起及歿哀毀如禮邑人以為難國祚性好書工數理每占輒奇中其讀史至篤行諸傳輒潛焉出涕以悲蓋天性然也康熙中表其門弟國祺字永齡亦以孝聞值邑中連大水以買地濟貧及災息仍還其券鄉人多德之廉璧字公完康熙二十年貿易寧津適年饑有錢

糧無措者至典子女以償璧覓之惻然捐數十金代
輸之甯津令李之華嘉其義給爲善最樂匾以獎之
崔崧字頴公崧貢生性直好義不沽名康熙初年
南澗北澗及小淀等莊地患水人皆減值求售崧如
其值契買之水退不取地亦不索值及視契內俱已
註故紙無用矣漢沽距北塘四十餘里無居人行旅
苦之崧中置茶棚三間龕帝君像以示嚴重冬月捐
糧施粥擇老而無依者主之卽以就近青坨莊荒地
資其採種以爲生迄今賴焉妻楊氏無出繼室邵氏
舉四子崧卒諸孤俱幼外侮內患交迫而邵氏以禮
解以情釋卒能撫子成立不墮前業人咸謂崧輕財
重義之報云

劉敏字恭勤增廣生六歲喪母稍長性嗜書積千
餘卷誦讀不輟父歿家事一付仲弟財用出入無所
問焉迨析爨凡器物房產一任諸弟所欲於夏物無
所擇生平以濟人爲心有求輒應人有負欠尤憐恤
之終不責償精醫學好施藥藉以全活者甚衆隱居
自娛樂此終身溷陽高士唐壽世爲之序云

劉祁孫字永齡例貢生授慶雲縣訓導舉止端方寬宏有度事堂兄猶胞兄待猶子如已子司鐸數年訓士有法教諸生以立品爲先里居爲鄉黨矜式邑宰議舉鄉飲大賓固辭乃不果行

談有序字虎侯少聰穎工文章弱冠補博士弟子員屢困棘闈遂棄舉子業治家人產中年家頗饒裕慷慨樂善救困阨濟貧乏鄉里中待以舉火者常十數家卽素不相識求無不應延師以教子侄親戚之可造者多附學焉供飲饌備束脩賴以成就者頗衆嘗

甯河縣志

卷之九

卓行

四

於天津買一婢不知其爲舊家女也後親屬備價收贖却不受卽日遣去曰聊以蓋冒昧之愆耳西關木橋三俱朽壞獨力修之又造東北窩二渡以濟行人值歲饑慨然捐米以助賑 道臺僧暨知縣李之蓉屠祖賚先後給匾獎之縣北朝陽寺亦其所修也邑令葉志寬尤重其爲人特詳請建彰善坊於通衢表厥姓名以爲好義者勸他如莊佃輩亦時加軫恤耕則助以工本耘則助以口糧有欠租者視其貧乏量爲蠲除其善行如此壽九十有三無疾而卒迄今過

彰善坊者猶嘖嘖稱其義舉焉

廉琮字公璧太學生先世家山西蒲州明永樂時移居邑南廉家莊後屢遷至四世祖始家於梁城所傳三世至國泰生子五人琮其幼也少卽以孝弟稱父母前承顏順志依依孺慕無須臾間事諸兄敬謹恂恂退讓一切未敢自先析產後任德民破婦安氏年十九孀居無所依惻然憐之常命家人給粟米布縷凡日用所需者無使空乏及病革猶以安氏旌典爲囑其篤於家者類如此性好施親戚及鄉里窮

困者以情告卽傾囊飲助無吝色他如修祠廟成橋梁平道路皆捐資以葺其事遇歲饑尤勇於赴義康熙四十三年水淹田禾蒙袂輯屨者絡繹於道琮顧家所積糧自計曰盡吾力而爲之於人或稍有濟也家人止之曰於人誠厚矣其如已何卒毅然不顧作稠粥以給饑者自初冬至臘盡三閱月糧匱始止時家亦日不得兼食而琮終以未能竟事爲憾雍正三年遭水患復毀家以濟之終身以善自勉居常卽以此教其子若孫子孫亦能仰體其意故於讀書之餘

輒以善相勗至今或列膠庠或食廩餼或膺選拔或領鄉薦人文濟濟皆以爲厚德之報云

廉 琨初名珍字顯吾太學生任陝西定邊縣知縣德薰之父也天性醇篤父好施克承厥志與伯仲兩兄相友愛雍雍然至老不倦居鄉慷慨樂義親屬有緩急叩之立應有迫於債者亦代任之及移名索討概不置辦至典宅鬻地以償勿悔渡橋利宇有地不能修者爲竭力捐貲傾囊不惜最喜儒學其子孫俱延名師教之邑中子弟來學有力不足者欣然飲助

每值年饑出粟以貸或貧不能償輒蠲之並焚其券嘗語人曰才本倘來物積而不散非計也指困贈麥昔人往往好行其德亦自尋常事耳生平性情和易遇卑幼亦未嘗疾言遽色有以非禮加者自反不校其人或愧謝則已若忘之其仁厚蓋天性也身躋上壽子若孫連掇巍科積善之報不爽如此

杜恭睿太學生廬州守立本之季子也生六月卽失怙生母王氏撫育之五歲就外傳怡然知向學性樸誠自奉儉約無統袴之習若義之所在則施予無吝

詩書喜讀通鑑善論古今得失至耄年猶手不釋卷
教子孫不惜厚幣延明師謂學期明理若志在溫飽
斯陋矣於館課餘暇訓以存心行事務規正大歷舉
暗室隳行故事示戒待族里誠實無僞一以禮貌相
接生平無戲言鄉閭咸信服之有以爭訟質者據情
論理無不立解於困乏加意周恤與之不少吝遇喪
葬婚娶必出所有以助造橋施藥善行未易更僕數
子毓珍成進士官知州毓珣領鄉薦

劉廷相字盛翊蘆臺人性孝友樂善好施寒者予衣

甯河縣志

卷之九

卓行

八

饑者予食貧不能殯者予棺率以爲常無所吝雍正
乙巳四月霖雨水漲歲大荒時按察司委員勸捐慨
然傾數百石以濟困乏黃公感其義以克光聖治匾
旌之他如橋路諸役皆首其事不惜厚費以助厥成
其善行歷歷在人齒頰間洵一鄉善士也長子毓琪
舉人任奉天錦州府義州學正次子毓珂副榜任江
西甯都州直隸州州判季子毓敬入雍肄業孫立詮
歷任邑宰餘亦有聲庠序

張以智本城人孝廉賓王之嫡孫也少事父母能得

其歡心過胞伯爲嗣奉之一如所生繼母病時以智
年將及艾身自扶掖五十餘日不少離性友愛兩弟
祿恕俱入泮舊有祖遺田廬以智悉舉而讓之爲燈
火資甘受淡泊沒齒無悔心年近八旬而卒乾隆十
八年闔邑追思善行公請表章知縣屠祖賚給匾以
美之

邵承富字紫寰居於鄉之營城里少失怙恃有兄伯
仲俱早卒孑然者一身矣家素寒承富以弱齡持門
戶艱苦畢萃於身然細大事無不各得其理時寡嫂

在嶷謹禮之無怠色昆之遺孤方在抱提攜飲食撫
字如已子迄於成人蔑有倦意旣爲兩孤成室知其
能自立也盡以先人所遺財產授之囑其善守而已
織悉不與所親美其能讓曰予非以爲名也懼無以
對若父於地下耳且吾方壯歲能食其力何分此以
自奉爲後勤生產漸至饒裕而益厚於宗族遞及姻
戚凡有緩急來告者卽囊橐未便無不悉力區處俾
如其意以去歲饑出其餘粟親歷附近貧戶以次賙
恤賴以存活者衆 方伯玉旌其閭額以惠被鄉隣

云所交皆端慤醇謹始終無間其有中道殂者或貧
窶力不能殯必身任之歲時設奠更舉其素行之善
戒子孫師法有子三人咸助理家事而諸孫皆守儒
業長孫蘭譜癸酉年拔貢先秉鐸滄陽繼補益州梁
山令孫蘭泰援例授州同知
貶封承富如其官卒年九十有三獲上壽焉

齊一德庠生秉性淳厚嗜讀書處事待人從無急言
遽色鄉中親友婚葬事凡力有難支者無不以爲已
任激勵後進務敦實學年近耄耋猶授徒不倦鄉中

甯河縣志

卷之九

卓行

十

有德行文章之目

劉繼成國學生岳州府同知劉守成之兄署高淳縣
知縣劉潛之父也弱冠失怙撫幼弟成名舉進士子
潛相繼登賢書次亦餼於庠選明經晚年鍵戶不出
常以廉吏勗其子處清貧恬如也卒享大耋受

恩榮焉

劉敬承國學生平生舉止端方存心仁厚樂施予於
親族貧乏無不周恤卽鄉閭間力所可爲者率以身
任之雍正九年改所爲縣縣署西倉及監獄地爲其

祖遺產時奉官價買敬承慨然願捐毫不受值又在
玉田縣道中有挈家避難者路費無資將賣幼女夫
妻相泣甚哀敬承路遇之詢得其情卽取錢贈之骨
肉得全其人感恩歎息而去平生行事大率類此至
今鄉里推爲長厚焉

廉德懋字聖修琮之子也琮好施與德懋能承厥志
里黨多重之及琮歿德懋遇事輒義形於色乾隆己
卯秋禾稼不登饑人載道慨然曰先君子而在其必
傾囊卹之乎予小子尙無忘先志焉於是首議捐粥

甯河縣志

卷之九

卓行

十一

及減價平糶近村之窮困無告者咸受厥施邑令謝
洪恩旌其門曰爲善最樂云

廉德惠字慈宇國學生夙有至性事親能色養厥兄
四人素敦天顯世居城南後因析居取次分門舊宅
序屬四兄時母氏在堂謂德惠曰汝係少子注念尤
切毋離邊使吾繫望也因遵命仍居舊宅至今垂五
十年逾兩世矣財產衣食公共如初訓子課孫倍費
心力生平好義重然諾於里黨能通緩急曾下鄉收
獲聞村中有聯姻已久忽追姻帖者詢之知爲索聘

無出從此退親惻然憫之曰財之困人一至此哉爲捐貲代聘令其允盟旣而男女長成貧不能娶又慨然曰造浮圖者必合其尖爲德不卒非夫也復出財助之迄今夫婦偕老子女盈門皆拜德惠之賜知縣任西華甫下車訪邑中之老成仁厚者擬以德惠爲首且云積善累功必昌其後因以厚德載福額表之劉 隸字位三山東道監察御史劉人睿之父也性孝友砥節礪行一嘔一笑不苟族黨奉爲楷模以子貴

甯河縣志

卷之九

卓行

三

封奉直大夫

杜延芳字嗣榮河南直隸陝州知州通文子也幼而端凝韶年時卽慷慨尙義七歲出就外傳所授書務究根柢不事浮誇迨長益攻苦經史莊騷莫不淹貫而掩抑精華常不以此自矜數試不售甲戌歲循例需次別駕每當家政之暇書卷未嘗釋手間約三五知已於花朝月夕或分韻聯吟或投壺較射青鞵布襪抱膝清談風致迥出塵表邑中修

大成殿開濬城河俱慨然捐貲悉心經理以成其事鄉

聞小嫌忿爭者每詣相質婉言排勸莫不釋然立解
戚里中咸以陳太邱目之

邵聯榜字攀林性嚴凝寡言笑而色養怡怡歷六十
餘年如一日其父承富以勤約起家聯榜實爲之助
事無大小必稟命焉所入財產盡白父無有私蓄教
子侄第言無拂祖志未嘗自爲訓也承富好施與一
切皆取辦於聯榜聯榜亦預貯以待親黨中有貧乏
不能自存者父未之知必以告年六十有六先父卒
彌留之際曰不得終事吾父其勿殮聞者惻然感慟

有子二長蘭譜其次蘭谷命繼叔氏後焉

邵聯勲字宗堯國學生性慤謹善事父兄少卽知服
勞義見父兄力作必曰子弟職也身任之速長尤習
勤苦一切田廬雜務勞手足者親率工僕次第以治
意欲無費堂上心居家儉約赴親友急慨然應命無
德色鄉人重其樸誠子蘭泰援例授州同邀

封以壽終焉

于際盛本城人年十七卽以孝聞親病衣不解帶者
累月及卒慟哭哀思經年不已篤於兄弟不忍析居

一切財產絕無畛域之見存生平重然諾慎取與交遊中咸推服焉鄉里重其爲人公請於縣給匾褒之知縣屠祖資稱其摯性在抱可爲他日纂邑乘者備善行傳之一其嘉予至矣

馬自誠字望宇候選州同知事親敬兄以孝弟聞年屆五旬惟一子因兄明宇無子慨然以日子爲之嗣後數年復連舉三子人以爲友于之報焉家素裕不吝貲財戚屬里黨中待以舉火者甚眾人有困窮災難倍加軫恤祖遺教軍場地附近梁城西郊不下十

餘頃多與貧窶無地者以葬嘗見北渡舟壞須改作所費不貲獨任之且經理四十餘年至廟宇道路橋梁或倡修或自捐不可枚舉蓋一生好善老而逾篤感斯發發必爲爲之必要其成成之不居其名 觀察使高公賜匾旌獎曰望重且評一曰一鄉善士寶城程公所獎一曰齒德兼優本邑楊公所獎更逢國之大慶三受

皇恩年九十五歲無疾而終

苗允亨本城人乾隆五年變賣已產代族人連葬五

喪八年重修朝陽寺碑亭屬邑士民公請給匾知縣李之蓉以可謂善人獎之壽九十八而終

鄭尙義字旺宇性好善樂施予凡冠婚喪葬事遇有困乏者無不周恤一時稱爲善士鄉鄰重其義公請諸縣以仁厚可風匾旌之長子元鳳長孫琮復能先後繼美庚寅恩科舉人國棟卽尙義曾孫琮之子也家聲克振識者知其有所自焉

崔文麟候選州同珏之嗣子也珏卒無子本支無可繼者議以文麟後之其本生母邵氏因幼孤撫摩弗

忍去而珏妻楊氏垂涕力懇乃許之文麟仍日夕承邵氏歡而事嗣母愛慕一如所生嗣母亦依以爲命娶張氏婉順於二姑間盡誠盡禮厥後本支突起以孫禰祖之難楊氏自傷孤寡憤懣幾不欲生文麟婉慰之曰此不過爲產計耳請親族三分之如其言難果息楊氏年九十有六而終文麟哀毀水漿不八越七日亦卒時學使者德誅之曰慈孝俱傳董之章字康侯邑南蘆臺人居數畝耕而食之晏如也性好施與雍正癸丑歲饑捐賑傾囊出之無少

吝數年復饑又捐米若干石鄉隣咸德之 布政司
玉 通永道僧暨知縣楊奇昌屠祖資俱先後給匾
以嘉其義享壽八十有九而卒四子琮字獲瑞歲貢
生篤行前型凡父志有未盡者概竭心力以要其成
一時稱濟美焉

孫燦字子章生有至性居家孝友能以濟人利物爲
懷嘗周恤隣里提攜親族建橋梁修道路人有貧乏
者每陰助之不欲令家人知也乾隆己卯歲饑捐粥
以濟知縣謝洪恩嘉其尙義以惠濟鄉閭匾額獎之

甯河縣志

卷之九

卓行

六

鄉黨亦稱爲善人云生平教子孫能擇師嚴其訓課
以故子列成均孫游泮璧積德而獲報焉

王應貴性樸實寬厚居常無疾言遽色以此率家人
故兄弟相親睦而子孫皆稟教訓嘗曰生人以孝弟
爲本知孝弟者必能讓讓則嫌隙無自而生得以聚
族合食焉和氣致祥家之肥也可不務乎子若孫謹
誌其言皆深自畏抑內外無間垂五世親屬七十餘
人猶共爨不忍各居其後家口更繁不得已始行分
析而門庭雍睦如初

馬 煥字斗南貢生少失恃事繼母楊氏如所生楊氏臨終握煥手而泣曰吾無所出卽有親生子亦未必能如若也旣冠父病兩載餘煥依依床榻間中夜聞呻吟聲卽起其至性使然也姊適寶坻孝廉方澄澄家甚寒煥迎養之周其空乏三十年未嘗拂姊意焉戚里有急難必委曲周全之遇莊佃以恩減租糧蠲宿欠不一而足可謂重于義而輕于財者矣

陳起龍弟起鳳性友愛不忍析居于孫仰體其志其中或經營生理或耕種田園計終歲所得並無此盈

彼緇之嫌幼子童孫亦各循循有序迄今五世合爨歷百有餘年猶謹守其遺法焉

王居仁南沽莊居民世業農克敦孝友七世同居居仁祖母李氏善持家年九十餘矣失明然家口百餘人事無大小必稟命一切耕獲所收及貿易所入悉以白李貯之公家無私蓄男女皆知禮讓家長未衣食幼稚不敢先或問居仁曰翁何以得此答曰只教兒曹不背祖宗耳家有圃植杏棗諸菓非成熟不採

摘

于敬祖字孝先少年穎悟迥不猶人眾目爲神童年十八入泮志若凌雲自負亦高甚自家庭間以至親族待之無不中禮後因染病得痰疾不得遂其志人皆惜之敬祖病廢後無所試其才乃復修輯家譜使木本水源條分縷晰亦可謂有益家政矣

常懷禮字恭亭生有至性事親色養兼隆友愛兄弟誼篤庭除族黨計乏力爲提攜凡可益人不憚損已以應之而自奉約抑動防過舉時集子弟誡之曰吾蒙業先人常恐失墜善作者貴於善承汝曹兢兢于

時保之生平教子務延明師集良友雖厚貲不惜以故子若孫或蜚聲黌序或叨列成均則其食報者長矣

劉芳字竹帛邑庠生也性聰穎喜讀弱冠補博士弟子員擅才思頗爲杜文端所器重由是知名父從新亦樂幽靜中年後築別墅于西隅蒔花種樹視塵事淡如也芳能體父志承顏順色歷二十餘年嘗云道不可須臾離親可須臾離耶父歿哀毀骨立幾不欲生喪事一準家禮其孺慕之誠雖終身如一日焉

子鉅恪守家風克承先志鄉黨亦以孝友聞

崔作霖邑庠生性純篤博通經籍環堵蕭然惟孜孜
修門內之行有古賢士風作霖既好學從游者日益
衆每樂爲誨之且好施予遇貧乏窘急者輒捐舌耕
之所得以助焉其訓子曰學者宜內外修潔不可偏
廢也故其子企峯亦能苦志績學以明經著於時
談謚字寓凝乾隆丁卯舉人卽嘉修之長子也兄弟
六人子姪蕃衍謚承父命延名師設三席教讀或勸
令就職謚曰父方以後進之學業爲急命我督率之

甯河縣志

卷之九 卓行

五

何敢諉卽况我父備嘗兩任艱苦每日人非有萬死
不渝之節不堪入仕其不欲我輩急於仕宦可知尤
當仰體此意惟日督諸弟及子姪輩勤學後弟清子
其學相繼捷於鄉縣令屠公額其門曰祖孫父子叔
姪兄弟登科未幾病卒

李承新號似道邑東北青坨莊人好善樂施其村至
豐臺三十里爲四方之通衢地極窪下雨水大輒阻
行人康熙四十年承新獨力捐資築大路一條建石
橋十二架往來甚便行者頌之事聞於尹憲旌以好

善樂施匾額至買舊利修景善菴捐良田四頃建關
帝殿修義塚其子孫歷次重修皆能敬承先德不墜
家聲

談其極字用之早失怙恃賴祖嘉修教養祖年踰八
旬嘗示之曰汝輩記吾言人家惟讀書可累世相承
勿替藉可明理非爲仕宦計也其極佩服此言雖貧
未敢忘學爲諸生時胞叔清官河南召之去不數月
歸人問故曰我輩當從艱苦中覓生活豈可貪逸樂
且熱鬧場與吾性左不若澹泊生涯因舌耕自給事

甯河縣志

卷之九

卓行

三

繼母鄭以孝聞性慷慨鄉里有緩急多賴之縣令夏
公知其方饒地方事每與委任焉年至古稀卒
書香累代相承今已十一世云

談照煦字廷號魯峯穎悟過人書無不讀獨不爲
舉業或問故則曰我自揣不克奮跡青雲浪博頭巾
有何意味遂以迂拙自安終身不試性嚴謹設館三
十餘年幼學出其門皆周規折矩見者不問而知談
門弟子也歿後數十年其教人法程人猶津津樂道
生三子松林最知名同治甲戌進士湖北卽用知縣

李德壽字瑞公國學生性好善樂施凡族黨冠昏喪祭無力者必周給之年七十六時家存帳簿一本親族負欠以億萬計病中囑令諸子毀券簿毋取償諸子應諾病已絕踰時復甦曰吾言汝輩未辦耶遂迫令取券簿牀前焚化訖病亦旋瘳後年至八十六無疾而終長子曇次子暄成父之志後先濟美邑侯關及合縣教佐官員以望重鄉閭瀛海雲龍二匾旌其門親族以敦宗睦族本根庇蔭二匾記其事至今孫曾輩克繩祖武家法勿替云

李 暄字善長德壽次子也繼父兄志爲善益力扶危濟急捐修廟宇橋渡不可勝紀其焚毀借券事與父後先一轍舊有祖遺錢舖一座凡親族告貸者皆從舖發付而舖內經手人錢財出入必登帳簿公暮年一日至舖檢閱簿賬總計九萬餘貫皆親族積欠也乃沉吟曰此我平日意計未週之過也卽將簿賬勾抹並立戒諭一條如子孫有索取者卽以不孝論今其後人皆恪守遺訓克迪前光曾孫誠蔚同治甲子舉於鄉人咸稱爲善之獲報不爽云

馮贊化漢沽南前坨人性慷慨樂善雍正三年大饑
出積穀數百石濟貧全活者甚衆寶坻廖令以德重
鄉邦匾獎之二子俱列成均諸孫蜚聲庠序乾隆間
修漢沽東橋及三官廟等處所費萬金皆其後人捐
助世繼其美贊化之遺澤長矣

王淳字沛霖國學生性倜儻好施濟能任大事邑
城西舊有板橋名曰鈞橋乾隆三十一年橋圯遂填
以土至嘉慶初年淳倡捐重修易以石橋長七丈許
昕夕督工風雪無間費不足則自捐補橋成記其事
於碑邑北朝陽寺年久傾圯獨力修蓋彌勒殿餘則
勸捐督修經理四年不辭勞瘁他如周困乏施棺槨
諸善行不能悉數

廉沅字香浦國學生候補刑部司獄家小康性儉
而好施廉族頗蕃待以舉火者數家遇有義舉從無
難色東河渡船朽敗時值年荒捐修甚難沅獨力修
成並精方脉凡貧病無力延醫者輒自往診視或苦
於市藥並代買付之從不取值全活甚衆三子一孫
皆孝廉至今書香不絕咸知好善之報當未艾云

廉 濤字松雲庠生性謹恪極孝幼喪母別無昆弟
父娶繼母劉一年後父忽病危醫云病之愈否但嘗
糞可知濤嘗之無味醫曰疾不可爲也一二日果卒
濤哀毀骨立喪葬盡禮家貧舌耕以供甘旨事繼母
四十餘年極得歡心蘆臺劉某濤之姑婿而兼母舅
也姑死二子貧率其孥就食於濤十餘年濤推一豚
之誼雖拮据無怨言居恒閉戶靜坐好臨摹古帖筆
力清遒終身不作行草卽尋常應酬無或苟年六十
餘卒

王 譜字仙泉號錄亭充內閣供事議叙從九品性
喜施濟嘉慶中戶書廉某私用田房稅銀三百餘兩
致監追譜代償之縣令嘉其慷慨議將田房稅撥伊
經理譜力辭之道光中管收豆糧劉某私用課銀四
百餘兩亦致監追譜亦代償親族貧者輒周給之與
弟析爨時房產多讓之欠債則自任之待堂兄誥若
同胞其子孫皆賴以成立有姊適漢沽崔某崔家落
譜盡室迎養之三十餘年未嘗稍拂姊意廟宇橋道
倡首捐修者甚多其善行今人猶傳誦之

劉立誠字格臣永春刺史儒懷子也生而聰慧讀書能文弱冠補弟子員蜚聲庠序父官闕時留公在家侍奉重堂公先意承志屢試京兆不第援例入成均已亥關令創修縣志公盡心採訪揆緝無遺蘆臺文冒閣日久傾圮大興吳公肇元擬新之請公襄助事竣刻石紀事公之力居多東窩北窩小楊等莊渡船腐朽公偕同志次第新之晚年精岐黃嘗施送藥餌至今父老稱道弗衰年七十六卒

劉從堯字敬唐邑北人性好施凡以窮困告者傾囊

助之無吝色勇於赴義乾隆五十五年歲饑道殣相望公慨然曰盡吾力而爲之於人或稍益乎遂市米以濟岳秀莊萬某將舉家離散公聞之惻然周以米布並與資本俾小貿易迄今萬氏子孫猶頌其德焉

劉映魁字文星國學生性慷慨事繼母以孝聞嘉慶六年歲饑代理人連葬四喪施棺六次令貧者採薪授值多賴以全活或曰公家柴草自足何積此爲曰吾非示富也使人自食其力而不與焉耳其子孫家聲不替識者知其有自云

常 越字巽峯歲貢生幼嗜讀性極孝食餼後因母病痿動轉需人率妻趙氏晝夜媾褻牀頭侍藥滌器形銷骨立者幾三十年母歿後不復留心舉業惟日以經書課子有詳批四書五經古文覺斯等書性好施予親族仰給者甚多尤篤於同氣有姊適馬室寡而貧每月給以錢米體恤必周四十年如一日使其遺孤成立馬姓後人猶稱述弗衰焉年九十餘卒

王者佐字廷相剛節公之父幼失怙事母以孝聞手創鉅萬資分爨時無錙銖之私凡負債不能償者必

撫慰而焚其券數逾萬金道光初年歲饑買數僮次年多逸去或請追之公曰歲荒彼父母鬻子得全活歲稔彼父子得完聚吾又何求其寬恕類如此訓諸子尤嚴故三子皆以文武科第起家剛節公其尤卓著者也卒年八十四

劉紹祖字繩武太學生好善樂施邑之西關莊北舊有東嶽廟乾隆末年廟貌摧殘牆垣頽圯公獨力出貲重修一草一木不捐於鄉黨邑人述公之善誌諸匾額百餘言其匾懸於正殿東壁永不朽焉

張 璞字荆石從九品楊家莊人莊東大道爲東北
通衢每沮洳難行嘉慶八年與鄉人議建石橋首先
倡捐繼按名勸捐共東錢二仟餘貫未收適遇水災
璞念鄉間窮苦捐輸不易而橋工不能歇遂將捐簿
銷毀獨力成之不費鄉間一錢義聲遠播

靳蕃蘭字漢卿蘆臺人生平慷慨好義嘉慶二十一
年山東姚某攜眷避難於蘆窳甚欲鬻幼女以自活
漢卿見而憐之周以三十金某感謝去道光元年歲
大饑蘆西大小薄莊嶺頭莊等處更甚漢卿積粟十

餘石稗子六十餘石傾倉助之蔡家舖趙某臘月在
蘆失票錢三百餘千爲漢卿之兄所得漢卿聞之慨
然日時逼歲除失此者恐致不測卽覓其人還之其
善行多類此年九十一無疾而終

孫重照守府燦之孫也好善樂施嘉慶丙子歲饑道
殍相望散積穀千餘石以濟之全活甚衆邑侯傅公
旌其門曰行高任恤

李卜七字景賢性真摯有寡姊二皆按月供給教養
諸甥各成一藝人以是重之舉人崔一士崔桐崔珮

等皆深器之嘉慶戊辰時家極貧猶勉措二金助崔珮鄉試珮此科遂領鄉薦貧而好古尤不可及卒時一士輓之云廿載綢繆高誼君情如手足一朝離別良時我憶話肝腸可想見聲應氣求之雅焉

崔 梧字飲之嘉慶戊辰舉人生而聰穎試輒冠軍接引後學孳孳不倦列門牆而摧科第者指不勝屈少聘同邑鄭氏年及笄未娶病歿鄭家風示之不願女作孤魂也梧遂迎骨歸葬邑耆老邵靄堂樂道其事以爲有古人風嘗舉徐水鄉刺元稹詩曰君臣兒

女情無二報國會無薄行流屬望之深可以想見子癸曾邑庠生克讀父書積學早逝士林借之

崔 霖字雨林性仁厚好善樂施戚里有窮乏者以情告卽傾囊助之無吝色於佃戶尤加軫恤年饑出粟貸之貧不能償者輒蠲之後家替將北李子沽出售佃戶等皆登門涕泣不忍舍舊主去霖因減價留官房七間水塢地基一處爲恩施後五世孫某過其鄉村人知爲霖裔猶留連欵待灑淚而別其行誼之感人如此

崔昌明字融淑貢生性至孝母病甚焚香告天願以身代手承痰血親滌溺器侍立七晝夜母病竟痊人以為孝心所感待幼弟友于彌篤一毫不私生平手不釋卷德優學富一時士大夫以理學推之

崔其俊字邁干性孝友嘗散步過村南石橋檢衣褶一件視其中纍纍皆白金也坐守以待日暮有騎從南來啼泣覓物即呼而與之其人分金謝乃笑曰吾愛若金早攜去矣忍饑以待胡為耶固卻之後家稍裕漸復祖基論者謂從忠厚中來也生三子長蕙田

甯河縣志

卷之九 卓行

天

國學生有父風修補橋梁道路廟宇本莊南北石橋三處南北茶棚大道莊內菩薩菴及掩埋枯骨澤及重泉雖非獨力所成而皆賴其贊襄樹德務滋其俊父子之謂矣

崔攀桂字步雲太學生性和易喜施濟因久侍母病精岐黃人請輒往不受謝廣施藥餌望重一時佃戶某以急難相投慨然納之歿後數十年猶頌聲不絕子紹祖克承父志以貢生援例授青藍頭司巡檢李加愿農人子也性至孝母病十餘年坐卧需人每

舉動皆躬自抱持之賣薪歸必市餅餌具時鮮以供
母少有餘輒存積爲母營後事妻子凍餒不計也鄉
里皆以孝稱之

史洪生字澤東郡庠生輝曾子也性至孝幼失怙終
身遵父遺命孝事母善視妹遂以孝友聞於鄉家貧
舌耕餬口雖甚饑寒不苟取有句云謀生計拙惟從
儉涉世才疎益謹言不殺生不食生魚及歿時盛暑
蠅飛滅迹棺冷如冰迨葬後繩集如兩人感異之孫
從周領同治庚午鄉薦人以爲修行之報焉

李源浩字靜淵庠生淮漁淀人幼失怙事母孝母晚
歲邁疾侍湯藥三年衣不解帶母歿哀毀骨立病幾
不起忽門有道士謂其子曰汝父病甚服吾藥可立
愈授紅丸三粒服之霍然時大水莊外無路可通不
知道士何來亦不知其何往人以爲孝行所感也道
光癸未甲申連年患水村落大饑散稊稗二百餘石
以濟之家多木料雇工造小船二十餘隻令無業者
駕以謀生因此多全活三子兩列膠庠一八大學皆
好義有父風

談維城家貧幼應童試未售以筆札應役公門藉供親膳鄉鄰以孝稱性耿介不妄取一日暮行於市檢白金一包約三十餘兩遂坐守以待夜分果有人倉皇而來則催糧戶張某也問明銀數還之張感謝去翼日備禮物錢帖踵門謝維城力却之至今人猶誦其盛德焉

王家駿增貢生歷任開州廣平府訓導爲人剛正精痘疹科概不受謝救貧家子尤多嫡堂弟家騏幼失怙撫養之爲其婚娶與以生業縣城三百大河惟西

面有北石橋一座爲赴京大道南橋一座乃三省通衢道光甲辰乙巳連年大水襟河成巨浸北橋陷南橋亦莫保駿首先倡捐邀同邑人孫世恩談瀛洲等鳩工由己園地取土填河築壩並葺地十餘畝其家美產也亦改爲大道任開州訓導時赴府送考因年老多病出門必攜身後衣衾適同寅學正韓寒士也在府城病故無力棺殮駿卽贈以衣衾買棺殮之後奉委兼理學正事凡學正應得之資仍付其家人外復助資使輿觀回籍知其事者咸稱義舉云

孫永會字慕文國學生邑東益確莊人幼聰慧性嚴正好善樂施每年饑鄉間咸仰給之宅外有餘地築室棲窮民凡喪葬無資者助之並精岐黃施藥材遠近問病求藥者門常如市數十年不倦至今人猶稱之

馬樂宏東棘坨農家子性好善其莊東西二橋通衢也日久傾圮樂宏欲修獨力難支乃百計經營忽病不起謂子振寰曰我死汝繼成一橋以終吾志不然吾目不瞑也後振寰出百金成之其他捐輸助賑修入武庠爲善獲報信然

李殿揚字文舉太學生慷慨樂施趙本莊趙某舊負銀五百兩欲挈家關外謀生因典宅地除資本外悉償債公曰此胡爲者無論不足吾數也卽足矣區區負欠使人棄產離鄉在子則義矣人將謂我何且本大則利長子可盡數挾去俟充裕再償不然吾亦無需此也趙愧謝退後獲利益多卒未償公亦未嘗往取一時咸稱厚德焉

張椿齡字樹仙蘆臺人附貢生屢困鄉闈捐知縣未仕性剛直見義必爲邑有善舉每倡首勞怨弗辭咸豐時粵匪犯津海防吃緊奉縣諭團練晝夜不倦邑賴以安嗣大股梟匪塘兒沽一帶肆掠公隨毛令督勇勦辦獲勝以軍功加同知銜同治元年蘆之回民不靖復建禮拜寺闔鎮驚恐稟請拆毀蒙憲斷永禁復修鄉人感頌不忘光緒二年歲饑倡立義善粥廠多全活素精岐黃求無弗應諸善事不勝枚舉弟椿蔭子文灝相繼登賢書

張 綱字維三性樸實謙恭從無遽色疾言子孫循循然有禮法五世同居親屬三十餘人或問曰翁家政何以致此答曰無他上下皆知讓而已親族以五世同堂額其門

劉朝書九品銜縣城南塘兒沽人讀書應試素明大義好善樂施精岐黃每自購藥材按方配製丸散隨症施送四十餘年不倦闔邑皆德之年七十九卒其子孫每歲夏間猶施送驅瘟等藥可謂善守家風者

矣

陳有典字慎徽附貢生博學能文料事明敏因體弱絕意進取兼精岐黃活人甚眾析居時家產器具皆取其最下者值歲大饑託修塋以濟貧乏施惠而不居其名故鄉人感德尤深至戚中有因事起釁幾成大案公聞信急往力爲排解事乃寢生平言行不避嫌怨惟期有益於人弟有訓無出早卒公子四以叔季爲有訓嗣孫鴻翊官福建汀漳龍兵備道鴻翕官貴州貴陽府知府

陳植字春圃生平重信義有大度入泮後家務紛

心不克進取暇時猶手一篇講誦弗輟性質樸韋布自安督諸弟分理家政子姪聰穎者從師授讀家庭雍睦重學尊師以故貢成均擢甲科者後先接踵外姻中有欠帳行數千金者債主屢取未得公始終經理其事宿債一清其信義服人有季路要我可無盟之風子二長鴻翔工楷法邑庠生早卒次鴻翽道光癸卯優貢以謄錄議叙官新樂縣教諭

陳棠字蔭召性剛直穎悟過人甫應童試因經理家政無暇讀書生平無妄語無惰容持身教子黜華

崇儉兼精岐黃求無不應尤加意貧苦全活甚衆喜施濟族人有負債二千金者命子姪焚其券道光丙申重修文廟指授規模工堅費省邑中橋渡道塗嘗倡捐修補見義勇爲成黨中有難事多賴其排解里人師公儉德至今不忘年七十六卒子三人皆有賢聲長鴻翥品學兼優尤爲衆所推許道光辛卯優貢山西甯鄉懷仁等縣知縣次鴻翊道光戊戌科進士由給諫官汀漳龍兵備道三鴻翊道光己酉優貢山東臨邑縣知縣

甯河縣志

卷之九 卓行

三

趙永祥字冀階性慷慨好施道光十九年海口戒嚴石軍門防堵北塘營已立欲築牆浚濠苦無費永祥卽捐東蚨一萬四千餘串立興工軍門重其人旋委兼理工程未幾工竣獎以八品銜永祥堅辭不受凡族中大事不能舉者必極力成之每歲除夕必遣人遍查村內極貧苦者分送錢米族人德之其和鄰睦族排難解紛今人猶稱道弗衰云

李中齡武庠生好善樂施凡修廟宇築橋梁皆首出捐資不辭勞瘁道光年間歲饑預買紅糧貳百餘石

至冬間賑濟並施錢不計其數又重修 文廟捐銀
三百兩經理四月餘籌畫周至工竣議叙六品銜
戴彬彤附生孝廉傅洙之次子彬元之弟也幼聰穎
性孝弟父應廉琴舫先生聘祖母年八十餘忽病重
醫者束手時彬彤年十七聞割股可以療疾遂攜刀
潛赴密林中割股肉四寸許血驟湧遽昏絕夢老人
以袖拂之醒創亦不甚痛持歸烹而進之祖母病立
愈兄聞而賢之延醫治數日後伸屈如常十九入邑
庠年二十一卒士林惜之

李熙春字文臺附貢生其先忠厚傳家世爲里黨所
推重承祖父餘蔭業儒攻苦倜儻不羈文如其人第
運坎坷蹉跎銷磨壯志入泮後再試不第家以落拓
慨然曰人生隨地宜自盡奚必待用於世耶於是修
其祖德舌耕承歡口授善誘生平無疾言遽色畛域
不分然和而介雖貧未嘗干人足不履公庭亦未挂
名岸獄暮年因子致家境從容乃急公好義篤宗親
恤孤寡修廟宇造橋梁補道路莫不傾貲相助捐施
以萬計皆自謂分內事也友于尤篤甘苦與共始終

如一轍焉壽七十六終

靳廷祥字瑞符干總銜蘆臺人幼孤有器識性孝弟從無疾言遽色凡親族有緩急來告者輒周恤之咸豐三年歲饑出粟賑貧同治元年瘟疫盛行施送棺木光緒元年正月將所存債券盡焚燬晚年好善愈篤見義勇爲遠近咸推仁厚焉

于化龍世居北塘善經營家頗裕乾隆五年歲饑慨然以錢米周給親鄰全活甚衆鄉人以善人是富額其門邑令趙公亦以鄉間模範匾旌焉

甯河縣志

卷之九 卓行

三

陳梅字香國北塘人性剛正不阿於俗幼讀書質敏而善悟補諸生旋食餼累薦不售道光乙酉科以優行貢咸均甯邑有優貢自此始諸子姪漸長延津門張采軒外翰館於家前後幾三十年訓迪無少曠公復督責嚴以佐師教之不逮於是十餘年中子姪以及至戚入泮食餼得優貢歲貢拔貢領鄉薦成進士者不下二十人好節儉一夜冠數十年不易至鄉間義舉雖多金無吝色豐財場竈戶虧帑八百餘金衆將繫獄公惻然代償人皆感服前葡六嵯商吳有

派船戶食官鹽之舉公援例並引前案鳴於官事乃寢北塘池濱海南北兩渡口向多淤泥非潮莫渡行人苦之公請於官以海防廢石督修兩岸碼頭行旅無阻至今稱便平生周急樂善大率類此六旬後日課諸孫自娛以家政付子鴻翥等經理復命姪鴻翥整頓船戶官差以甦積困迨八旬時創立本村文社使姪孫學會總其事賴以成就者甚眾以子鴻翥貴

疊遇 覃恩 晉封資政大夫年八十九歲卒子四

人長鴻翥太學生 贈封通議大夫次鴻詡附貢生

甯河縣志

卷之九 卓行

美

由肥鄉縣訓導分發江蘇候補藍翎同知補用知府
三鴻翥道光己酉科拔貢工部七品小京官洊陞郎
中貴州貴陽府知府花翎三品銜候補道季鴻翰太
學生 贈封奉直大夫孫學思學周學陸皆諸生學
彭同治庚午科優貢 朝考以教職用改內閣中書
家聲丕振人謂皆公之厚德肇其基云

董清佑字祿申增貢生蘆臺人好學尙義慷慨樂輸
治家則井井有條處世則人人欽慕鄉有義舉必首
先倡建人是以樂從歷任 邑侯下車伊始卽諮訪

公地方公事成取決焉咸豐年間髮逆竄亂督辦團防蒙 督憲慶保奏奉 旨以訓導選用嗣因英夷擾境 親王僧道出蘆臺度地設防首先召公諭令挖濠築牆募勇守衛境賴以安後因捻匪竄境練勇得力蒙 尹憲萬王保奏奉 旨賞加五品銜公識見濶達喜排案解紛邑有疑難事成延訪公到輒渙然冰釋如是者不可枚舉尤好修橋補路邑之善舉公所倡建者居多如渡船大石橋最要衝也年久頽圯非特有褻裳之虞兼有滅頂之凶公慷

然修舉而人得穩渡他如城門橋梁要路孔道以及溝濠水塢凡有關於地面者無不次第整理尤能挹注凡城裏有善舉亦必代籌襄辦文廟其顯見者也至如蘆邑廟宇西有魁星樓東有文昌閣巍然對峙文運恆視以爲盛衰公毅然以重修自在踵其基而高大之樓甫告成而禮闈報捷者若而人閣未蕝事而鄉薦獲售者又若而人邑東有寶塔寺明朝寺也坐鎮良方規模宏遠然無人敢議捐修者公獨設法籌辦克成善舉功甫過半而公之子已捷甫宮矣率

至積勞染疾以壽考歿時卒年六十有七子四長雲樟次雲楫太學生叔雲標成進士分部曹季雲棨邑庠生

論曰古君子以躬行爲先務濂溪周子謂實勝爲善名勝爲恥意可見矣後世風俗日漓人鮮古處悖理傷道者無論已卽讀古人書輒以浮華相尙風流文采非不悚然動人求其實行克敦卓乎可傳者往往難之蓋古風之磨滅久矣甯邑習尙滔樸其風流文采不知視他境爲何如而實行厯厯有人斯卽古風之未泯也苟聽其湮沒無傳爲善者將何勸乎茲就其有據者詳核而備書之庶曉然於實行之足貴而浮華之士聞其遺風亦可少知自反也夫

甯河縣志卷之九

耆英

于思敬字禮亭生於前明嘉靖四十一年入

國朝年屆期頤妻韓氏壽如其夫並於順治十三年卒

夫妻同壽偕老百年闔邑傳為盛事杜文端公以百

歲齊眉匾頌之復錫賀言以誌不朽洵足為

熙朝人瑞云

廉一元厚德人也壽九十有六三沐

恩榮龐眉皓髮安享遐齡知縣沈澹加敬禮焉給椿蔭垂

甯河縣志

卷之九

耆英

三

遠匾額以美之

張維德字秉彝乾隆十六年知縣屠祖賚奉 憲詳

報老民赴都慶賀

孝聖憲皇后萬壽

欽賜黃套養老銀牌藍緞元寶各一特荷

恩榮年八十有六卒

張維倫字尊五乾隆十六年知縣屠詳報老民

孝聖憲皇后萬壽

欽賜黃絹一疋特沐

寵榮壽八十六卒

張士標字際會邑中舊族也少穎悟喜讀書尋入邑庠志高尚淡于仕進遂不復應試性孝友處已接物能相與以誠故里黨有端人之目焉後以鄉飲大賓見舉邑侯以齒德兼隆匾贈之年九十六卒

張廷縉監生天性純謹不少放佚生平能以誠心相
何年八十恭遇

孝聖憲皇后八旬萬壽蒙

恩特授恩榮邑侯黃公贈以璧雍碩彥匾額年八十二

齊河縣志

卷之九

耆英

三

而卒

張廣基字輿圖歲貢生壽一百零三乾隆己亥

欽賜舉人庚子

欽賜都察院都事乙酉恭與耆臣宴三沐

恩榮龐眉皓齒安享遐齡里黨榮之

張 琰字華卿性孝友居恒以禮讓爲先子孫皆能承其教家門雍睦五世同堂枌榆中咸推盛德制憲胡公褒以七葉衍祥匾額乾隆六十年恭與千叟

恩宴賜黃套養老銀牌各一壽九十六卒

廉 遇字行可增生性友愛嗜書積千餘卷誦讀不輟不理家務瑣事析爨時謂諸弟曰一切產業隨爾所欲惟書卷盡歸吾其友愛如此晚年惟日課子讀書乾隆乙酉恭與千叟宴

賞賜龍杖黃褂銀牌等件壽八十九無疾而終

侯連山倒流窩舊族也性和厚無疾言遠色尤喜推解爲交遊推重嘉慶丁巳

恩賞九品銜親族以天錫恩榮匾頌之壽九十三卒

俞海山西關人一百零二歲恭與千叟宴三次

甯河縣志

卷之九

羹

堯

恩賜銀牌綾緞等件同人公送百歲期頤齒德兼優匾額

俞永康西關舊族也壽九十五嘉慶戊午蒙

恩賞九品頂戴白髮盈頭優游杖履里黨以澤潤耆英匾頌之

楊卓菴潘莊人幼聰穎早失怙恃見善必行兄弟析居時美產俱讓兄自安淡泊後家小康凡戚黨有求輒應鄉人或有爭端必反覆勸解爭者往往聞言下淚年八十五終弔者如市

恩賜徵仕郎

崔日謨年七十八嘉慶庚辰恭遇

萬壽盛典

恩賜九品銜黃絹一端銀一兩

劉增貴字介堂城東塔慈莊人性忠厚好善樂施年逾六旬從倒流窩移居塔慈莊和鄰睦族延名師課子孫塔慈地窪下早憂燥潦患湮同治三年出資雇人臨河挑溝挖坑注水於莊東建石橋一座便車馬往來由是水得宣洩旱亦無患莊人無不歌頌年至八旬猶強健

甯河縣志

卷之九

耆英

甲

恩榮八品壽官年八十五卒

王 沅字鳳池家貧事親孝性慷慨中年家漸裕人有父喪不能舉者竭力助之年九十二終

恩授徵仕郎

陳 檀年八十二

恩賜徵仕郎

劉自玉字富堂邑中舊族也壽九十九孫曾繞膝白髮盈頭枌榆中羣相敬禮咸稱

熙朝盛事云

傳 嵐號雲房增生品學兼優謙恭接物生平未履
公庭年八十餘卒

張毓棠字召亭歲貢生忠厚和平有古風生平言行
必謹訓子弟以孝弟爲先後人亦能守其教壽至八
十九卒

韓慶年農人貌端嚴寡言笑凡年歲豐歉人事休咎
預言之無不奇中里中急難事多賴其排解鄉黨至
今頌之年九十七卒

劉國惠世業農勤謹孝順待人忠厚凡耕穫之時無

甯河縣志

卷之九

耆英

四

力者恆委曲成全之壽八十九卒

李連旺小楊莊人忠厚和平見義必爲凡莊中修橋
廟挑道築堤必首出倡捐以襄其成鄰里偶有不平
必極力排解鄉黨共推爲長者年八十四卒子發身
樸實忠厚能繼家聲

胡自仕大楊莊人孝父母和弟兄性勤儉好善樂施
每遇義舉首出倡捐凡駕橋修廟補道築堤多賴其
力年逾九旬精神矍鑠子孫蕃衍五世同堂光緒四
年無疾而終壽九十九

高文光字射斗少有器量席素封好施予見義必爲
矜恤貧困尤出至性乾隆辛未分巡通永副使僧公
以惠被鄉鄰匾旌其門乾隆六十年蒙

恩預千叟宴並

御賜詩靈壽杖玉如意齋戒牌並妝緞等件曠典也生平
尤重讀書延名師不惜厚聘遇應試者輒資助其四
子鎮領乾隆戊申科鄉薦後代科第不絕年八十一
卒

張有昇字在天資質英偉兄弟五人兄早卒率諸弟

宵河縣志

卷之九

耆英

壘

以勤苦持家規矩嚴肅教子姪分習文武蜚聲庠序
生平尤崇信義年九旬鄉人以喬齡永錫匾祝之以
子文富貴加六品封典年九十六卒

翟可敬字顯章性篤誠勤苦自立後家境充裕贍親
睦族不惜重貲延名師訓子弟成名者先後接踵乾

隆六十年蒙

恩預千叟宴並

御賜詩靈壽杖玉如意黃緞綢紗荷包等件年八旬閭邑
送忠厚傳家匾以祝之年八十六卒

張毓楷家貧耕種爲業耕餘之暇則擁綱鑑諸書誦讀不輟平居和顏悅色雖婦孺見之皆肅然起敬龐眉皓齒年高德劭現年九十七

梁有敏于辛莊人生平慷慨見義勇爲現年九十七

壽婦 附

劉氏塔淀民徐應科妻農家婦也賦性貞淑信樸未

漓生於順治十二年至乾隆二十三年壽一百四歲

白髮盈頭孫曾繞膝洵閭閻盛事也 督憲方 題

準建坊

甯河縣志

卷之九

壽婦

聖

旌表復蒙

加恩賞上用緞一疋銀十兩闔邑榮之

陳氏太學生王淳妻年九十七氏勤儉持家義方訓

子道光十八年五世同堂題請

旌表

恩賞牌匾銀三十兩黃緞一端龍頭杖一柄

張氏武庠姚嵩坪繼妻賦性貞淑不苟笑言有大家

風年四十餘夫亡子幼家無立錫因依於母氏晝夜

勤苦教子大琳成立迨白髮盈頭孫曾繞膝長孫星

燦已入膠庠而氏猶日理家政俾門以內井井有條
不惟梓里間咸仰女宗亦闔邑之盛蹟也氏於光緒
六年二月間無疾而終壽九十

論曰昔文潞公留守西都集洛中公卿大夫年德高
者爲耆英會讀史者至今欽慕其風斯固古名臣高
致哉而不數數也若乃勲德未著於時杖屨優游安
享壽考稱鄉里善人是亦足矣雖校之古人名位固
殊焉然枌榆中羣相敬禮未嘗少以窮達異也况

朝廷寵錫元老表揚以及有司之褒美尤爲闔里榮哉

詩曰壽考維祺以介景福如諸人者洵足當之矣

甯河縣志卷之九

流寓

沈 周字石田江蘇長洲人性高曠蕭齋兀坐常若有崇山巨壑在其胸次故隨筆之所至生氣勃勃遊京邸與崔國祺相友善嘗訪國祺於海上因僑寓焉運墨雅不墮人窠白國祺曾以倪迂舊帖強摹之見石田自記云

李孔昭字光泗薊州人性孤峭崇禎癸未歲進士見時事日非不赴廷對以所給牌坊銀留助軍需遂去

甯河縣志

卷之九

流寓

四

奉母隱於盤山甲申流賊陷都城聞變將死之以老母在白衣冠哭田間者三載

大清定鼎求遺賢 撫按交章薦以病堅謝不出一日當道遣吏持書幣往遇負薪者呼問若識李進士耶負薪者張目曰問李進士奚若吏具道意乃以手遙指負薪去吏至其室虛矣訪之隣叟曰若面失之向所見負薪者卽是也其後屢物色之卒不得當道太息而已會劉繼甯方擇師慕孔昭高義詣山中固請許焉然一念母卽夜深必歸時黃冠時儒服衣著屢變

人亦不知爲李進士也時邑中方興役吏按戶派夫
驅孔昭孔昭曰我力不任願出資以代吏持去閱數
日杜文端歸聞孔昭在邑急往候吏聞趨謝罪孔昭
曰此間豈有李進士耶若勿誤由是踪跡逾不可必
矣庚子正月孔昭爲弟子講孟子盡心章畢曰此傳
心法也又曰吾晚年愛陶詩汝曹味之言訖而逝門
人私諡曰安節先生

王師旦字淑萃寶坻教諭元洲國賓子也隨父之任
父謝事遂隸籍焉師旦生五歲卽能通孝經義旣而

甯河縣志

卷之九

流寓

聖

學文於張文休授詩於高際斯講易於蕭韓坡問禮
於吳攬初叩心學於蔣闡如而正性理於李光泗業
日益進自 學使熊鍾陵先生有國士之目繼者交
口無異詞凡二十餘試皆第一而師旦年且老矣以
康熙丙寅充歲貢遠近耳其名迎主講席嘗曰人於
日用行習間時將天理體認令其惺然不昧則寡過
之道得焉師旦老不廢學所著作皆以抒寫心得無
復人之見者存時鄭南華隱居北塘爲子擇師厚幣
延之相得甚歡戊子授容城訓導葺學宮備祭器舉

節孝爲元儒靜修劉氏立後手輯文廟備考一編
在任十有六年士多化之雍正元年引歸卒於里所
著有斯文纂南華註年齒譜及文集詩集其寓海上
時門人劉源崔體健崔瑞麟存其語錄三十篇寶而
藏之學者稱曰盤峯先生

陳 佐字子輔號古愚文安縣人康熙戊子登賢書
詹事府營田使儀弟也世代科名學有源本因與豐
臺劉瑞南善遂得往來於梁城與邑人劉那孫馬自
誠談有仁羣相唱和詩文贈答蓋稱莫逆云初梁城

甯河縣志

卷之九

流寓

巽

爲寶坻屬文武試俱隸焉順治辛卯後八十年間聲
華闐寂自佐寄居樂與都人士講習討論別裁僞體
轉益多師有以文請者必面加評證點竄塗改絕無
隱避從此人才蔚起科甲聯綿甯河文風之盛羣奉
古愚爲先洵不虛也進士劉守成舉人談嘉修皆及
門受業後選授河南孟津縣知縣其子若孫俱領鄉
薦焉

杜 巖字魯瞻山東濟南府青城縣人本文端公族
曾孫康熙四十年間僑寓梁城品格端方學問淵博

士人咸推服之而虛懷若谷仍求教於文安陳古愚先生凡有詩文必就正焉自此才力增長筆下湧泉遂領本省鄉薦後設帳授徒門下士凡數十百人舉人廉德薰孫述等皆其所造就也遊泮食餼者尤不可勝計乾隆八年旋里未仕而卒

論曰賢者足跡所至輒有光於人國故卽偶然遊歷其遺風餘韻每令人流連欣慕於不衰蓋其人可思其跡彌不可沒矣元以前流寓蓋難言之由明以來得五人焉沈公周雅士也李公孔昭王公師旦益高

矣其餘二人者立品端方亦矯然於流俗之外且安節而下後先授徒於此遊其門經其指授循循然莫不有規矩迄今溯淵源者猶辨香祝之又不僅石田之以藝傳矣要其遺跡均何容沒歟聞從都人士遊訪其逸事弔其僑居之所猶穆然想見其人於海濱岑寂間也况此邦人士餘蘊未泯者耶